

Mazarin  
3229

Relation veritable...



UNIVERSITY OF N.C. AT CHAPEL HILL



00023009469

**RARE BOOK  
COLLECTION**



**THE LIBRARY OF THE  
UNIVERSITY OF  
NORTH CAROLINA  
AT  
CHAPEL HILL  
Mazarin  
3229**



7m  
3229  
RELATION  
VERITABLE

DE CE QVI S'EST PASSE'

ENTRE L'ARME'E

• DE MESSIEURS

LES PRINCES,

& les Troupes Mazarines

Commandées par le Ma-

reschal d'Hauquincourt,

apportée à Son A.R. par

Monfieur le Comte de

Gaucourt.

A PARIS,

Chez NICOLAS VIVENAY,

Imprimeur Ordinaire de Monfieur le Prince

---

M. DC. LII.

*Avec Permission de Son Altesse*



RELATION

VERITABLE

DE CE QUI S'EST PASSE

ENTRE L'ARMEE

DE MESSEIERS

LES PRINCES

& les Troupes Maxarines

Commandees par le Ma

re Chah d'Harcourcourt,

apportee a son A. R. par

Montieur le Comte de

Gascourt.

A PARIS,

Chez NICOLAS VIVENAY,

Imprimeur Ordinaire de Montsieur le Prince

M. DC. LXX. V.  
Avec Le suffrage de Son Altesse





## RELATION VERITABLE

*de ce qui s'est passé entre l'Armée de Messieurs*

*les Princes, & les Troupes Mazarines,*

*Commandées par le Marechal d'Hoquin.*

*cour, apportée à Son Altesse Royale par*

*Monsieur le Comte de Gaucourt.*

**I**L n'y a personne qui puisse plus jamais douter des bonnes intentions de Monsieur le Prince apres ce qu'il vient de faire, & nous pouuons dire que tous les soins que le Cardinal Mazarin & ses Partisans ont pris de descrire sa conduite sont bien inutiles, elle se iustifie assez d'elle mesme, & fait bien voir qu'il n'a d'autre interest que le repos de l'Estat, & qu'il n'a pour but que de s'opposer aux perniteux desseins du Cardinal Mazarin.

Il neust pas sitost eu auis de la part de Son Altesse Royale que le Cardinal M. apres la prise d'Angers auoit resolu de porter la Guerre aux environs de Paris, ayant pour cet effect deux Armées assez considerables, & voulant par la sacrifier à sa vengeance tous ceux que le bien public a rendus ses ennemis, qu'il partit de Guyenne apres y auoir mis tous les ordres necessaires. Quelque peril qu'on luy peut représenter, & quoy qu'on luy



fit voir qu'il estoit presque impossible de trauerfer tout le Royaume, il l'a pourtant fait en huit iours luy dixiesme : mais non pas sans auoir couru milles perils, il enuoya estant passé la Loire quatre lieux au dessus de la Charité, le Sieur de Gouruille avec vne creance à Son Altesse Royale pour luy faire sçauoir qu'il venoit pour receuoir ces commandemens, & pour seconder ses bonne intentions, & l'asseurer qu'il n'espargnera pas son propre sang pour destruire l'Ennemy commun, puis que c'est le seul moyen qui puisse donner la Paix a la France, & reestabli par la l'autorité Royale si abatuë. Il seroit mal aisé de vous pouuoir exprimer la joye que Son Altesse Royale tesmoigna auoir de l'arriuée de ce Courrier. Et ie croy que personne n'ignore en France celle qui parut generallyment dans Paris.

Il arriua à Lory, le premier de ce mois, où il trouua les deux Armées commandées par Messieurs les Ducs de Beaufort, & de Nemours, la joye qui parut dans toutes ses Troupes, & l'enuie que ce Prince auoit d'entreprendre quelque chose de considerable, nous firent bien iuger que nous ne serions pas longtemps, sans auoir quelque auantage sur les Ennemis. Son Altesse partit de ce lieu là, le lendemain pour marcher à montargis où le Sieur de Gurouille estoit avec deux cent Cheuaux, & pareil nombre de fantassins qui luy auoit refusé les portes. Monsieur de Beaufort auança encore avec deux cens cheuaux qui furent aussi refusez, en-  
fin



fin l'armée estant arriuée deuant la place, son Altesse leur donna demie heure pour prendre leur derniere resolution, ils se rendirent, & monsieur le Prince y entra & y demeura vn iour, où son Altesse ayant eu aduis certain que les ennemis vouloiēt passer la riuere de Loire, elle iugea à propos qu'il falloit mettre son armée en ce lieu, ou il yeust de quoy faire subsister la caualerie, & d'où on pût estre en estat d'empescher les ennemis d'aller du costé de Paris pour executer les mauuais desseins du Cardinal Mazarin. Le passage de Montargis leur estant donc fermé par le moyen de trois cens hommes que son Altesse auoit laissé en garnison dans le Chasteau, commandez par le sieur marquis de Creuecœur, & iugeans qu'ils ne pouuoient marcher de ce costé là qu'en passant par Chasteau renard, ou plus haut, son A. creust qu'il estoit important d'occuper ce poste avec l'armée, & par ce moyen se mettre en estat de combattre les ennemis s'ils y vouloient passer, & pour cēt effet son Altesse partit à la teste de l'armée le cinquiesme de ce mois de Montargis, & arriua le mesme iour à Chasteau Renard, duquel lieu ayant enuoyé diuers partis pour auoir des nouuelles des ennemis, ils luy rapporterent le lendemain matin que les deux armées des ennemis auoient passé la riuere de Loire, & qu'ils estoient logez en plusieurs quartiers, que l'armée du Mareschal d'Hocquincourt qui est la vraye armée du Cardinal, puis que c'est celle avec laquelle il est entré en France auoit l'Auant-garde, & s'e-



estoit logé en vn village nommé Preteau ; & que les  
 Dragons de la Ferte Senerre, d'Hocquincourt, &  
 de manicamp estoient logez à Rogny, & deux au-  
 tres villages tout auprès qui gardoient les passages  
 & les ponts de la riuere de Loin, & du canal qu'ils  
 auoient aussi quelques troupes à Bleneau, & dans  
 d'autres villages, & que l'armée du mareschal de  
 Turenne estoit à Briare, Vlooy, & autres lieux sur le  
 mesme canal. Son Altesse ayant appris certaine-  
 ment la separation des quartiers des ennemis, elle  
 jugea qu'on pouuoit entreprendre dessus, aussi tost  
 elle enuoya prier messieurs de Beaufort, de Ne-  
 mours, de la Rochefoucault, de Clinchan, de Taua-  
 ne ; & les mareschaux de Camp des deux armées,  
 de se rendre à son logis, ou il fut tenu conseil de  
 de guerre, & resolu tout d'une voix d'aller droit  
 aux ennemis, monsieur le Prince fit à l'instant mes-  
 me tirer deux coups de canon pour rassembler les  
 fourageurs & les soldats escartez qui reuindrent  
 avec tant de diligence, qu'à midy l'armée se mit en  
 marche : On ne pouuoit aller au quartier de mon-  
 sieur d'Hocquincourt sans passer aux passages que  
 les Dragons gardoient à Rogny. Son A. se resolut  
 d'aller à eux, & d'y arriuer à l'entrée de la nuit afin  
 qu'ils n'eussent point de connoissance de la mar-  
 che de l'armée : mais comme le poste de Chastillon  
 estoit de la derniere importance, estant necessaire  
 d'y passer auant que d'arriuer dans les quartiers des  
 ennemis, on detacha monsieur de Chauaignac  
 mareschal de camp, avec cinquante cheuaux pour



s'en aller faisir, ce qu'il fit: à l'entrée de la nuit on  
arriua à la veüe du quartier de Rogny, on vit les  
feux des ennemis de l'autre costé de l'eau, & on iu-  
gea qu'ils gardoient le pont. A l'heure mesme on  
détacha cinquante cheuaux Allemans, avec ordre  
d'aller au pont, & de dire qu'ils estoient de l'armée  
de monsieur de Turenne, & qu'ils reuenoient de  
party, pour obliger les ennemis à les laisser passer,  
& avec ordre de les charger: A l'instant mesme le  
Regiment de caualerie de Condé, & celuy d'An-  
guyen, avec deux cens mousquetaires de son A. R.  
& de Condé les soustenoient, & le reste de la cau-  
alerie faisoit alte là auprès pour faire ce qui seroit iu-  
gé à propos selon que l'attaque reussiroit, les Alle-  
mans firent ce qui leur auoit esté commandé. Ils  
parlerent long temps aux ennemis qui ne les vou-  
loient pas laisser entrer, mais qui ne tiroient pas  
pourtant sur eux; dans ce temps vn païsant dit à son  
Altesse qu'il y auoit vn gay plus haut à trois cens pas  
de là, ce qui l'obligea de prendre le reste de la ca-  
ualerie, & à y marcher. Son Altesse ayant laissé,  
messieurs de Beaufort, de Tauane, & de Lanque à  
l'attaque du pont avec les mesmes Regimens, &  
pria monsieur de Nemours de passer à la teste du  
regiment de Conty commandé par le sieur de Iau-  
uelle, qui a parfaitement bien fait en cette occa-  
sion: & de celuy de Perlan, son Altesse le souste-  
nant avec monsieur de Clinchan à la teste des trou-  
pes Allemandes: les ennemis n'auoient aucune  
garde au gay, & s'estoient contentez de le rompre  
en y jettant quelques arbres: mais il ne se trouua



pas si bien rompu, que monsieur de Nemours ne trouua moyen d'y passer; & monsieur le Prince ensuite: là les vint joindre le Comte de Gaucourt de la part de son A. R. qui depuis ne quitta point sa personne; on donna à mesme temps dans le quartier: & monsieur de Beaufort à la barricade, ayant auprès de luy messieurs les marquis de la Boulaye, le Comte de Castres, de Silly, Couteville, & autres qui ne l'ont pas abandonné en toutes ces occasions, le quartier fut forcé, & la barricade emportée; on tua tout ce qui y fit resistance, le feu se mit dans le quartier, & tout ce qui s'estoit sauué dans les maisons fut pris ou brulé, monsieur de Nemours poussa iusques à vn village à vn quart de lieuë de là, où estoit vn autre regiment de Dragons, soustenus par le reste de l'armée, il enleua ce qui ne s'estoit peu sauuer dans le chasteau d'un Gentilhomme, & ny eust de tué pour tout en cét endroit qu'un Cornette du Regiment de Comty, nommé la Noirtiere: les ennemis enragez de ne pouoir sauuer leurs cheuaux & leurs equipages, mirent le feu dans les maisons, où il y eust plus de quarante cheuaux, & quantité de bagage brulés, le cheual de Monsieur de Nemours y fut blessé, on somma en mesme temps le Chasteau qui ne se voulut point rendre sans voir le canon, lequel estoit encores loing, & S. A. ayant impatience d'aller au quartier general, pria Monsieur de Beaufort de le faire aduancer, lequel passant proche du Chasteau y eust son cheual blessé d'une mousquetade, & son Capitaine des gardes, aussi l'Infanterie & le canon arriuerent, on les somma

pour



pour la dernière fois, & se rendirent prisonniers de guerre. Après auoir veu le canon, Monsieur de Tavanne voyât ensuitte qu'il y auoit vn quartier dans vn village prochain, il donna dedans & l'enleua; on marcha à mesme temps aux autres quartiers qui estoient le long de la riuere, Mr de Beaufort donna dans vn où estoit vn autre Regiment de Dragons, on en prit vne partie, le reste se sauua dans vn Chasteau qui fut assiégué & pris par Monsieur de Villars.

L'Armée marcha ensuitte droit au quartier de Monsieur Doquincourt qui auoit desia eu l'alarme, & s'estoit mis en bataille derriere vne petite riuere, Mrs de Nemours & de Beaufort donnerent à la teste du Regiment de Condé, soustenus par Mr le Prince, à la teste de celuy d'Anguien, on y trouua peu de résistance, tous les bagages de l'armée y estoient, quantité de Caualliers & de Fantassins, & tous les domestiques des Généraux de cette Armée, tout fut pris; il se trouua quantité d'or & d'argent monnoyé, & quatre seruiCES de vesselle d'argent, plus de 150. chariots & trois carrosses des Généraux, & pour le moins 200. mulets ou cheuaux de bas: enfin le butin se monte par l'anneu mesme du Secrétaire du Marschal d'Oquincourt à plus de six cens mil liures.

Les ennemis ne parurent plus en cet endroit-là, on passa au trauers du quartier & on se trouua sur le bord de la riuere où les ennemis estoient en bataille de l'autre coste, ce qui fit résoudre S. A. de la passer; & après auoir fait fonder le Quay de tous costez, on ne trouua qu'vn seul endroit où il ne pouoit passer qu'vn cheual, & avec beaucoup de peine, Mr de Ne-



mours passa à la teste d'Anguien soustenu de M<sup>r</sup> le Prince qui estoit suiuy de M<sup>rs</sup> de Beaufort, de la Rochefoucault, de Clinchan, de Tauanne, de Lanque, Briole, comme aussi de M<sup>r</sup> le Prince de Marsillac & des Comtes de Guitaud, Gaucourt qui ont tousiours suiuy M<sup>r</sup> le Prince dans toutes les attaques, & y ont doné des preuues de leur valleur. Le Regimét de Clinchan arriua, & les ennemis plierent sans cōbatre & s'allerent mettre en bataille sur vne hauteur prochaine derriere vn quattier qui estoit dans vn village; M<sup>r</sup> le Prince ne les eust pas si tost aperceus qu'il dona dans le quartier, où l'on trouua quelque bagage qui fut encores pillé. Il passa outre, mais comme il n'y auoit que trois Regimens de passez, & que quasi tous les Caualliers s'arrestoient au pillage, le feu qui estoit encores en quelques maisons, fit voir aux ennemis la foiblesse de S. A. & leur donna d'attendre vn escadron, touna d'abord & vint fort bien à la charge, on le rompit, mais il fut soustenu de trois autres, & les trois du reste de leurs troupes qui firent vne grande descharge, Monsieur de Nemours y fut blefé & son cheual tué à mesme temps, ayant auprès de sa personne les sieurs Cheualiers de merle, de Lech son Capitaine des Gardes, qui ne l'ont point abandonné dans toutes ces attaques; ce qui mit en desordre le peu de troupes qui estoient là, mais S. A. s'estant mise à la teste d'une partie, Messieurs de Beaufort, de la Rochefoucault, de Clinchan & de Tauannes, ayant ralié le reste, & le Regimét de meilles estant arriué auprès de Monsieur le Prince, on retourna à la charge avec tant de vigueur que ces Messieurs les



ayant chargez par la teste, & Monsieur le Prince en flanc, tourplia deuant eux: Le sieur Vuarin Lieutenant Colonel du Baron de Clinchan y fut tué, le sieur de la Liberté & Darficourt Officiers Allemans y furent blessez, le Cheual de Monsieur de Clinchan y receut deux coups de pistolets, celuy du Capitaine des Gardes de Monsieur de la Rochefoucault y fut blessé d'un coup de pistolet, & le sieur Marquis de Bellingreulle, neveu dudit sieur de Clinchan, volontaire dans l'armée de son Altesse Royale y fut blessé à la cuisse & son cheual tué.

Ensuite on se mit en bataille attendant le reste des troupes qui passoient avec grande difficulté à cause du défilé de ce ruisseau. La pointe du iour estant venuë, on vit le reste de leurs gens qui ne se tenant pas en seureté dans vne petite Ville nommée Bleneau, passoit la riuere & se sauuoit dans les bois, Monsieur de Beaufort poussa à la teste du Regiment de Condé, Monsieur de Clinchan avec son Regiment & Monsieur le Prince à la teste de la Cauallerie, ayant aupres de lui Monsieur de la Rochefoucault, on passa la riuere à la portée du mousquet de Bleneau, & on poussa les ennemis à trois grandes lieues de là, tousiours tuant & prenant ce qui ne pouuoit courre assez vite: le chemin estoit tout couuert du debris de leur equipage qu'ils iettoient afin de mieux fuir. Dans ce temps-là Monsieur de Nemours qui estoit demeuré dans vne maison pour se faire penser, manda à son Altesse que le Marechal de Turenne marchoit à la teste de son armée pour venir au secours de celle



qui auoit esté defaite, & qu'il paroïssoit desia sur vne  
 eminence au delà du ruisseau, Ce qui obligea Mr  
 le Prince de marcher de ce costé-là, & de faire  
 faire alte proche du lieu où il auoit enleué la nuit le  
 quartier d'Oquincourt, où il se trouua encores de-  
 quoy rafraichir toutel'armée, de fourrage, d'auoine,  
 du pain, & du vin, sur les charriots qui estoient re-  
 stez du pillage. Cependant les troupes de S.A. se ras-  
 semblerét qui estoïét fort dispersées, tant à cause des  
 diuerses attaques qui s'estoient faites pendât la nuit,  
 que la poursuite des fuyars ou au pillage. Il y auoit  
 encores entre les deux armées le ruisseau que Mon-  
 sieur le Prince auoit passé la nuit, mais comme le  
 iour les choses se reconnoissent mieux, il trouua  
 deux ponts, qu'il fit passer luy mesme aux troupes  
 de son Altesse Royale, qui auoient l'auant garde, &  
 mit en mesme temps son armée en bataille au delà  
 du pont. Son Altesse vit que les ennemis s'estoient  
 postez au bout de cette plaine, en vn lieu où elle se  
 retraissit par deux grands bois, qui ne laissent d'es-  
 pace que pour passer trois ou quatre escadrons de  
 front : encores ce lieu est reserré par vn estang & vn  
 marais. Ils s'estoient postez si près du bois, que son  
 Altesse jugeant que son Infanterie estant meilleu-  
 re que la leur, il les en pourroit déloger par vn grâd  
 feu, & les prenant en suite dans cette première con-  
 fusion acheuer de les defaire. Il fit donc marcher  
 par la gauche le Regiment de S. A. R. & par la  
 droite celuy de Languedoc, commandez par le Ba-

ron



ron de Vallon, Mareſchal decamp, ſouſtenus des Regimens d'Aulac, des Genſdarmes & Cheuaux-legers de S.A.R. Il ſe rendit maître des deux bois. Et comme il faiſoit ſuiure toute l'armée, Monſieur de Turenne jugeant bien qu'il ne pourroit maintenir ce poſte de la façon dont on l'attaquoit, ſe retira dans vne grande plaine, à meſme temps Son Alteſſe fit garnir le bois par ſon Infanterie, & voulut voir ſi les ennemis ſe tiroient tout à fait, ou ſ'ils ſ'éloigneroient ſeulement hors de ſa mouſqueterie, pour ſe mettre en eſtat de les charger quand il auroit la moitié de ſon armée paſſée; pour cet effet il fit ſortir cinq eſcadrons, & ſe mit à la teſte avec Monſieur de Beaufort, faiſant mine de les vouloir ſuivre. Le Mareſchal de Turenne voyant cela, tourna avec ſon armée, & croyant prendre l'autre dans le deſordre où on eſt quand on repaſſe vn deſilé, vient à eux: Mais Monſieur le Prince, qui preuoit toujours bien ce qui luy peut arriuer, fit retirer ſes cinq eſcadrons long temps deuant que les ennemis puſſent ioindre. Monſieur de Clinchan ayant déjà fait ouvrir les troupes qui eſtoient dans le deſilé, le canon de Son Alteſſe commença à tirer ſur les ennemis, & le leur ſur ceſ troupes, ils n'oſoient venir à nous à cauſe de noſtre Infanterie, ny nous defiler deuant eux, à cauſe de leur Cavalerie. Le reſte de la journée ſe paſſa en coups de fauconneau & en legeres eſcarmouches, où le ſieur Comte de Maré Mareſchal de camp, fut bleſſé, & ſon cheual tué d'un coup de canons. Le ſieur de la Cheſe com-



amendant le Regiment de : le sieur André Capitaine au Regiment du Duc de Witemberg, le sieur de la Tour Lieutenant Colonel de Languedoc, y furent pareillement blesez du canon. Ce dernier estant tout contre le sieur de Vallon, qui fut tout couuert de terre du mesme coup. Et le Comte de Bossu commandant la Caualerie Allemande, comme plus ancien Colonel, pensa estre emporté du coup que receut le Capitaine André. Mais les ennemis croyant, comme estoit le dessein de Monsieur le Prince, qu'il passeroit la nuit en ce mesme endroit, & que le lendemain au point du iour il les obligeroit à combattre, se retirerent droit à Briare: Son Altesse les suiuit quelque temps; mais la nuit estant suruenüe, il se trouua hors d'estat de les pouoir combattre.

Comme on les suiuit, Monsieur de Beaufort parla à Monsieur d'Hoquincourt pour luy demander son Lieutenant des Gardes, qui auoit esté pris sur la frontiere de Picardie, avec Monsieur de Nemours. Il luy dit qu'il souhaitteroit bien faire la reuerence à Monsieur le Prince: Ce qui obligea S. A. d'y venir, à laquelle ledit Mareschal d'Hoquincourt dit, qu'il deuoit marcher le lendemain, & que cela auoit esté la cause que le Mareschal de Turenne n'auoit esté si tost prest, & que sans cela il l'auroit trouué dans le mesme desordre que luy.

Je ne vous nommeray point les Officiers que leur courage y a fait remarquer, puis qu'il ny en a pas vn qui ne meritaist vne Relation particuliere,



outre que toutes les troupes qui ont donné, y ont esté avec tant de chaleur, que ce seroit faire injustice aux vns que de louer la valeur des autres.

Je ne vous feray point non plus le détail des morts ny des prisonniers, ie vous diray seulement que toute l'armée que commandoit le Marechal d'Hoquincourt est defaite. Ce qui n'a pas esté tué ou pris, ayant esté entierement en déroute, & qu'à peine les Officiers generaux s'estoient ils sauuez, qu'on a enuoyé tous les prisonniers domestiques au logis de son Altesse qui les va renvoyer, ils sont au nombre de plus de cent, nous ne sçauons point encores le nombre des Officiers & Soldats qui sont prisonniers, estant encores diuisez dans les troupes, mais ie sçay bien qu'il y en a autant qu'on a pû s'en charger.

Bien qu'il suffise de dire, que Monsieur le Prince a assisté à cette grande action, pour faire iuger à tout le monde, qu'il y a agy comme il a accoustumé de faire, dans toutes celles qu'il a iusques icy si heureusement acheuées. Je ne puis m'empêcher de dire, que s'estant parfaitement acquitté de la charge de General. Il ny a point de Soldat qui aye plus perilleusement exposé sa personne, ayant toujours soustenu les coureurs qui ont entré dans tous ses quartiers, & ayant toujours chargé les escadrons qui ont fait resistance: Enfin quoy que sa vie soit vne suite de choses extraordinaires; ie puis dire que cette action n'est pas de celles qu'il faut le moins admirer: Il fist pour le moins dix lieues,



enleuant tous les quartiers d'une armée, sans que les vns se puissent sauuer par l'alarme des autres, il arriuoit en mesme temps que ceux qui portoient les nouvelles de leur déroute. Aduoüons donc qu'il n'y a iamais eu personne au monde, qui aye sçeu profiter si heureusement, des belles actions que sa valeur & sa prudence luy font faire.

Quelques loüanges que meritent les Ducs de Nemours, de Beaufort, & de la Rochefoucault, le Baron de Clinchant, le Comte de Tauane, & tous autres Officiers Generaux; le me contenteray de dire qu'ils ont touïours esté aupres de la personne de son Altesse, ou executé les ordres qu'elle leur a donné, aussi bien que le Prince de Marcillac, Cintel, de Guitaut, de Gaucour, de Lignon, de Rochefort, & le Cheualier de Paillé, quoy qu'Officier dans Condé, a touïours esté proche de son Altesse.

Voila donc l'armée, sur laquelle le Cardinal Mazarin a fondé son retour entierement défaite: Si apres cela, le Conseil de la Reyne la porte à le retenir plus long-temps, tous les François qui ont esté ébloüis iusques icy, ne doiuent-ils pas ouurer les yeux à leur aueuglement, & se rallier avec les bien intentionnez au seruice du Roy, pour accabler cét ennemy commun, afin de faire la paix generale, comme Monsieur le Princey est engagé, & reestabli l'autorité.

F I N.







